

任縣志卷之五

人物

宦蹟

鄉耆

俠義

隱逸

列女

宦蹟

魏

游雅字伯度廣平任人少好學魏世祖時與渤海高允等俱知名徵拜中書博士累官至太子少傅領禁兵進爵爲侯出爲雍州刺史甚有惠政徵爲祕書監命修國史雅不勤著述竟無所成性剛好凌人因論議長短忿儒者陳奇遂陷奇至族議者深責之和平二年卒贈相州刺史諡曰宣侯子僧奴襲爵卒子雙鳳襲雅弟恆子曇護太和中爲中散遷典寺令後慰勞仇池爲

賊所害贈肆州刺史

節錄魏書

游明根字志遠雅從祖弟也祖鱣為慕容熙樂浪太守父幼為馮跋攝廣平太守明根幼年遭亂為櫟陽王氏牧奴以壺漿倩人作書於地上習之長安鎮將竇瑾見之呼問知其姓名乃以告雅雅使人贖歸教書年十六辭雅還鄉里為土室讀書積歲雅稱薦之北史為中書學生綜習經典高祖踐阼遷都曹主書帝以其小心敬慎每嗟美之假員外散騎常侍冠軍將軍安樂侯使宋前後三返宋稱其長者迎送之禮有加顯祖初拜東兗州刺史改爵新泰侯為政清平民德之入為給事中遷儀曹長號為稱職後王師南討詔參謀軍計兗州民叛詔明根慰喻敕南

征沔西仇城連口三道諸軍稟明根節度還都授尙書參定律
令屢進讜言以年踰七十表求致仕不許頻表固請乃許之其
年以司徒尉元爲三老明根爲五更行禮辟雍及歸廣平爲造
甲第國有大事恆璽書訪之太和二十二年卒於家年八十一
世宗遣使弔祭贈光祿大夫加金章紫綬諡靖侯子肇襲爵

肇字伯始高祖賜名幼爲中書學生博通經史及倉雅林說高
祖初爲內祕書侍御中散累官至太子中庶子以父老解官高
祖欲令遂祿養乃出爲本州安南王禎鎮北府長史魏郡太守
王薨復爲高陽王雍鎮北府長史太守如故爲政清簡甚有聲
迹數年以父憂解印景明末徵爲廷尉少卿固辭乃授黃門侍

郎爲畿內大使黜陟善惡賞罰分明轉太府卿徙廷尉卿兼御史中尉黃門如故持法甚平尙書令高肇世宗之舅也以肇名與己同欲令改易肇以高祖所賜不許高肇甚銜之世祖嘉其剛梗盧昶之在胸山也肇諫曰胸山蕞爾假在海濱於我非急於賊爲利故必致死而爭恐難必克假令克之亦難久守所謂無益之田也聞彼屢以宿豫求易胸山臣愚謂此言可許世宗將從之未及行昶敗遷侍中梁軍主徐元明斬其青冀二州刺史張稷首以郁州附魏朝議遣兵赴援肇表曰元明之款雖理當奔救然六里胸山地實接海陂湖下溼人不可居郁洲又遠在海中所謂雖獲石田終無所用兼之年不順成百姓飢敝軍

糧資運取濟無所見其損未覩其益且新附之民喜逸惡勞勞則生怨怨則思叛思叛則不自安不安則擾動脫爾則兵連難解矣不納及大將軍高肇之伐蜀也肇復諫亦不納肅宗卽位遷中書令光祿大夫相州刺史有惠政徵爲太常卿遷尙書右僕射固辭詔不許肇斷決吏事必再三詳審然後下筆不以諮呈迫促不爲寵勢屈撓方正之操人咸服之及領軍元乂廢靈太后將害太傅清河王懌乃集公卿會議於時羣僚失色莫敢正言肇獨抗言不可終不下署正光元年八月卒年六十九贈冀州刺史諡文貞肇外寬內剛篤好經傳手不釋書通周易毛詩三禮撰易集解冠婚儀白珪論及詩賦表啟凡七十五篇皆

傳於世其爲廷尉也世宗嘗私敕肇有所降恕肇執不從曰陛下自能恕之何必令臣曲筆也其堅執如此及肅宗初近侍羣官豫在奉迎者自侍中崔光下並加封邑將封肇文安縣開國侯邑八百戶肇獨曰子襲父位今古之常因此獲封何以自處固辭不應論者高之子祥

祥字宗良頗有學問歷祕書郎襲爵新泰伯遷通直郎國子博士領尙書郎中肅宗以肇昔辭文安之封復封祥祥亦不肯受乃追論肇前議清河守正不屈封祥高邑縣開國侯邑七百戶孝昌元年卒年三十六贈幽州刺史諡曰文子皓

皓字賓多襲官侍御史早卒皓弟安居襲爵新春伯武定中爲

司空墨曹參軍明根叔父矯中書博士爲濮陽鉅鹿二郡太守

卒贈相州刺史矯孫馥國子博士馥弟恩進尚書郎中

節錄魏書

舊志曰史稱游雅才華高允之亞明根朝之舊德國之老成
二公並著於時然游雅絕世莫祀明根之後相繼貴顯何哉
游雅陷族陳奇才優於德明根處身仁厚德優於才報施之
理有由然矣

隋

游元字楚客廣平任城人魏五更明根之玄孫也

謹按游明根載魏書及北

史均廣平任人今任縣也此作任城蓋誤

父寶藏位至太守元少聰敏年十六齊司

徒徐顯秀引爲參軍周武帝平齊授壽春令譙國司馬俱有能

名開皇中爲殿內侍御史數遷至內監煬帝嗣位遷尙書度支
郎遼東之役領左驍衛長史爲蓋牟道監軍拜朝請大夫兼持
書侍御史宇文述等九軍敗績帝令元按其獄述時貴倖其子
士及又尙南陽公主勢傾朝野遣家僮造元請屬元不納他日
與述相遇因而數之復以狀劾之帝嘉其賢賜朝服一襲九年
奉使於黎陽督運楊玄感舉兵欲諷元附已元正色答曰僕有
死而已不敢聞命玄感怒而囚之屢脅以兵竟不屈遂遇害贈
銀青光祿大夫賜縑五百疋拜其子仁宗爲正議大夫弋陽郡

守書

論曰游氏顯於元魏迄今更歷數朝時逾千載其苗裔之在

任者雖未有如先世之顯達而子姓蕃衍耕讀傳家亦可謂
世澤綿延久而弗替者矣

明

馮義少有志操洪武八年舉人授給事中犯顏敢諫帝甚重之
陞四川按察使以報國爲心未嘗爲家計當時莫不仰其清節
卒祀鄉賢

舊志

王疊先世燕人父景賢始居任疊永樂六年舉人授平度州同
知以忤中使坐遣戍遵化州子整上疏求代詔許之疊得歸整
代戍凡二十八年英宗復辟赦歸一年而疊卒整遂不復求仕
有子震教以讀書弘治六年震成進士官戶部主事越三年而

整卒震以憂歸服闋仍官戶部歷員外郎中出納錢穀稱職授
 鄖陽知府遷河南參政轉布政升應天府尹奏罷上元江甯花
 園夫千餘人省諸官寺器具銀千餘兩覈江灘蘆葦千餘頃以
 佐州縣里甲之費致仕歸歷任所購書籍千餘卷悉送府庠公
 諸士子其孝思篤摯至老不衰建永感堂以寄孺慕焉

節侯志
忠王公

墓誌兼採分省人
物考及江南通志

按王翰奇家廟碑景賢為元駙馬王郁之次子而墓誌不言
 故闕之

王翰奇字英夫五世祖郁為元駙馬隨順帝北行始祖母攜三
 子長景元次景賢次景初駐於任之十里亭遂家焉景元傳四

世而生翰奇少以孝聞由歲貢生授濱川司馬卻陋規均徭役

攝新城篆安輯流離循聲卓著陞雲南鹽課提舉平土府阿堂

及叛臣王一新案楚雄叛蠻阿方稱王起兵約土官王一心等為援事在嘉靖四十三年此云阿堂一新蓋字

之誤也擢遼東安樂州整肅軍衛撫綏士民遼左咸稱之卒祀鄉

賢採王氏家廟碑

韓翼永樂六年舉人砥礪操行官主事時河決為患漕運艱苦

莫有能塞之者翼奉命至輒塞之以治水有功陞大理寺少卿

平獄緩刑無訟冤者立朝四十年憂國愛民始終如一卒於官

詔賜祭葬祀鄉賢舊志

李厚字洪載成化十七年進士授偃師令剛明果斷吏畏民懷

時值荒旱勸富賑貧民卒獲濟以政最陞御史直節凜然時議犒軍雲南同列憚其行厚曰爲臣不可避難奮然請行至雲南處置有方甚得蠻心丁父憂家居守令欲爲修宅厚固卻之卒

祀鄉賢舊志

毛玘字國珍爲諸生兩讓例貢於其次者登成化二十年進士授蒙陰令先是母久失明玘迎養官舍誠禱於天朝夕焚香跪飴母曰母曰復明人以爲孝感有積逋不輸玘召逋者諭之寬其期卒盡輸有犯奸逆者密以金祈脫玘不受竟正其罪大參某以均徭役意有所希玘曰殘下媚上吾不爲也郡守有子之喪他邑祭賻甚腆玘獨不致卒以是忤當道解印歸卒祀鄉賢

孫朮登進士人以爲餘慶云

舊志

謝謙爲諸生博通經史例應貢以次貢陳讓家貧讓之敦尙風

化力持雅道任教授歷仕二十載以引年歸

舊志

謝旻字仁夫爲諸生時講明義利崇正學以淑人心時值流寇

猖獗旻首倡大義激勸士民守城卒賴以全登正德十二年進

士知長安縣政尙平恕時中官劉瑾煽虐誅求四出民弗堪命

旻力卻之百姓全活無算及代去民立石繪像祀之擢戶曹會

計稱平撫定州礦賊屏迹官至陝西副使卒祀鄉賢

舊志

謝朝用字達夫貢生初判德州政尙平恕勸農儲穀植柳萬株

於漕河兩岸以蔭行人抵二載卽致仕歸生平風節慷慨學行

純雅鄉閭爭師事之諸生多出其門尤嚴義方之訓子孫相繼

成名卒祀鄉賢

舊志

謝冲敦尚儒雅不事浮華事父母睦宗族處鄉黨咸有可稱置

義冢以葬無力者由貢生任長治丞居官無玷佐治有為以母

憂哀毀成疾卒

舊志

謝洙副使旻之子也任永州通判志行超卓蘊藉不羣建書院

修橋梁歲饑則行糜平居唯杜門誦讀而已

舊志

謝國英字獻可副使旻之孫別駕洙之子也少而穎異秀爽博

學能文章於書無所不覽徹尤解聲律工吟咏贈答詩文咄嗟

可辦手輯邑志有良史才方為諸生謂青紫芥拾乃竟扼於一

第以貢謁選得州貳人謂賂主爵者當得善地國英曰人之一
出一處莫不有定吾烏以賂爲乎竟得簡州簡在蜀去家數千
里風俗殊異至則以教化佐專城州人比之文翁署羅江篆父
老攀轅留朝烏以誌遺愛尋以巡臺薦擢判懷慶轉輸餉務舊
有布糧之役易染指國英曰吾家世清白先人田廬儘饒世業
奈何以民之膏血實吾橐笥哉毫不取部使者及院司咸異之
以才能署濟源民爲勒石頌德立祠俎豆之忽自歎曰吾東山
尙在松菊猶存也營營五斗胡爲者乃請於當事解組歸與故
人知友聚首閭里飲酒論舊拇迹不入公門晚益肆力於詩及
課子讀書而已行年七十餘萬歷戊申無疾而終

節李起元謝
龍溪墓表

翟聰邑人弘治十一年舉人正德甲戌授山西猗氏縣知縣政
成民和連年豐稔民感其德形於咏歎有瑞麥之歌嘉禾之頌
具載猗氏縣志一時撫按交薦任滿入覲卒於家

節 翟玉翟
公墓誌

高大經爲諸生時逸才拔萃下筆成文名噪諸郡嘉靖八年進
士授歷城令陞知州大經自弱冠知志學時以不得其門恐遂
墮落汨沒聞陽信令徐子講陽明學往從之遊已復講於齊東
薄岳子初甚駭愕繼而有疑旣而信確見陽明之學以良知盡
人心之全體以致良知盡人心之實學與紫陽講學之旨初無
異同又恐徒事口耳不能誠諸踐履之實因取傳習錄刻之以
重自勗勵蓋以此爲姚江的傳學派也卒祀鄉賢

李景萃嘉靖二十六年進士累官至參政文章政事卓有可稱
詩賦才華擅名列郡去官之日浙人勒碑頌之

舊志

達其道字行甫初名潛督學于公閱其文詫曰此天下士也豈
得終潛爲更今名舉嘉靖三十七年鄉試第一明年成進士授
工部主事掌權濟甯諸閘癸亥轉員外郎職後司庫出納庫與
閘俱財利府而皆不以自潤甲子遷郎中肅皇帝命疏玉河甚
迫衆僚皆怵尙書雷公以其道應工成賞白金綵幣丙寅轉河
南按察司副使提督學校歎曰今之督學者每先文藝而後器
識徇干請而抑孤寒此其係於世教者非渺小也乃綜覈文行
以嚴黜陟權要子弟不少曲假士風丕變隆慶戊辰以病乞休

謙退若儒生莫知為達官也卒祀鄉賢

分省人物考

杜宗壽字子靜由上舍除鴻臚寺序班甫一年以母老乞終養世宗可其奏降玉音褒美之踰九年母歿復起為長子承多惠政不忍以敲扑催科百姓稱真父母旋致仕歸居家樂善好施鄉人皆稱祭酒云卒祀鄉賢

舊志

陳松字秀夫貢生為人剛明清慎歷任太原濟甯至瀋府審理所在剖決疑獄廉能有聲屢為當道獎勵歷十四載引年致仕王婉留弗從賜錢幣為祖宴手書詩章褒之其居家醇樸篤實人稱為古君子卒祀鄉賢

舊志

趙文炳字為光一號含章任人也自祖父以上世業農至文炳

始以仕進顯少爲諸生與南和朱正色相友善抵掌談天下事
旁若無人隆慶庚午舉於鄉意必欲由甲科仕每六戰罷歸輒
下鍵讀書再接再厲凡五上春官不少挫最後乃投筆歎曰弊
精神以爭一第何若攝尺寸柄有所樹立之爲得也且今不仕
如二老人何於是始就銓選授山東新城令新城多右族習尙
奢侈文炳乃示之以儉日惟蔬食非文會不設魚肉祭胙則脯
腊而藏之以供往來行李憲司皆重其廉分惠珍饌文炳竟卻
之其敷政也課農桑禮教裁抑豪強而附循其貧弱民皆自
愛而重犯法滿四載丁內艱歸居喪哀毀骨立如不欲生侍嚴
親左右復灑然改容也服闋爲垣曲令所以治垣曲者一如治

新城御史大夫呂公新吾最器重之首騰薦剡謂當置之臺省折檻補牘必大有裨益國家詔拜御史時首輔趙志臯年已七十耄矣柔而懦爲朝士所輕詬誶四起言官相繼論列方其始爲首輔最先上疏劾之者則文炳也指斥過失如揭日月而行故時論翕然歸之已奉使按楚方是時木綱之役孔亟吳楚貴均苦之爲奏封事請寬請賑民賴以蘇察吏嚴肅墨吏多望風解印綬去再奉使按晉疏中使殃民凡八事虐焰少熄有大奸倚親藩爲蠹者賄奪皇場軍竄課逋下檄親丈之弊竇爲清諸所約束視按楚時加愆事竣念親老求歸養章三上皆不報旣而及瓜得代便道歸省居三閱月歷取前代誤國閹宦人主崇

信之以得危敗者繡圖書事輯爲萬年金鑑錄日暮奏上會行
次涿州再疏請終養旨下部院留之不爲覆文炳以進不能見
上退不能奉親不勝鬱鬱疾大作屬纊無一語及家事第曰恨
金鑑錄未上耳時萬歷壬寅也平生睦親族敦友誼輕財貨內
外親屬待以舉火者十數家尤汲汲於地方公益捐金於學爲
課士資捐金東鄉建閘修橋後世猶食其惠其按晉楚所薦引
多知名士若康漢驥孔紹虞喬傲我後皆以抗直爲名御史斯
則以人事君之義所謂維其有之是以似之者也邑侯羅公表
其墓曰眞御史洵無愧哉

節羅文寶御史趙公墓表
兼探明史及山東通志

霍維蒞字仲馥世爲任巨族祖守忠事親以孝聞親沒廬墓三

年父凌陽喜施予維蒞其第三子也以貢謁選隆慶丁卯授山西米脂尹地邊蒙古俗雕悍號難治維蒞蒞官五載禦外安內為西北保障歲壬申陞河東督運司副使調停鹽課民不擾而稅增丁內艱歸萬歷丙子服闋擢雲南通安州守地涉萬里與蠻雜處人或為維蒞難之維蒞不謀於妻子獨偕一二僮僕毅然赴焉蠻帖然服化當道推重以循良薦維蒞自陳衰老當道挽留之不可遂致仕歸

探霍公墓表

毛炯萬歷七年舉人官汾西縣知縣心恕法嚴屏絕私謁興學

校栽桑柳教織紡織悉備至祀山西名宦祠

山西通志

杜允恭貢生任訓導告歸遇歲饑捐二百金與弟姪共分之敦

睦宗族人以爲有二疏之風

舊志

謝時鳴貢生性孝友樂施與讀書不事章句惟以古人爲法既食餼每戒家人作飯以供族人之往來城邑者或問之曰此君恩也焉敢私嘗遭族中無賴困辱門人謝九錫將報之時鳴曰此族叔也受之可耳司訓淄川每謂諸生曰詩書是爲聖賢榜樣非藉以求富貴也卒於官

舊志

國朝

檀莊字惺涵弱冠爲諸生數奇屢躋秋闈莊安分自若以貢生就教於歙邑故煩劇課士之外諸務填委莊理之案無留牘晉潼關教授致政歸待人以誠與物無競然所見既定雖千夫弗

能奪也

舊志

檀遐祐字都明順治初年以貢生任真定府學司訓攝晉州篆理冤別蠹士民德之擢元城教諭修廟課士文教聿興

舊志

李永昌字茂之號德符幼岐嶷過人及長端凝渾厚以孝廉授晉之大同未幾丁外艱補浙之澹安兩邑皆夙號難理昌游刃裕如其治澹尤以拔薶抱嬰爲事三載當報最以耿介忤當事歸去之日民臥轍留之迨

國朝定鼎舉遺佚授繁昌縣時江南初定人懷攜貳昌以靜鎮之卒獲甯謐丁內艱再補陝之通渭邑爲邊鄙沙磧地自流寇芟夷逋賦無算吏茲土者悉突不黔而投劾去昌獨視如家事

茹荼理之三年如一日竟以課殿鐫級及歸囊橐蕭然杜門不預戶外事日與知己啣盃三徑而已凡四治劇邑在在有政聲而皆勿克竟其用云卒祀鄉賢

舊志

苗澄字大生而成次子也性仁孝博洽經史尤精毛詩弱冠補弟子員明末流離關左雖極顛沛猶不廢學居遼久遂通滿洲文語本朝定鼎需才甚亟世祖親試多士以澄才兼文武特置首選由侍衛授啟心郎章疏一經披閱輒報可撰譯四子書書進覽賜蟒玉鞍馬寵眷獨隆諸從龍世家子弟咸執經問道尋晉僉都直言侃侃稱真御史十七年總督河務親履河干講求利害遷邳城築遙隄有條陳兩河奏疏切中時弊未幾

代去旋晉副都節制瀛海揚清激濁開荒解逃著有勞績山東
巨寇作亂一鼓擒之授四川總制晉尙書銜時巴蜀初定整肅
部伍恩威並濟興屯裕餉撫順招攜不遺餘力蜀賴以安方古
韋臯張詠 詔還京授尙書兼步軍統領卒於官

舊志

劉滋號霖蒼其先晉之洪洞人也明成廟時遷民實畿輔劉氏
祖得祿始居任之留壘村七傳生盛時卽滋父也盛時字清宴
明諸生素有德於一方明末世亂寇賊相戒以母入劉公家及
滋令績溪隨之官勗以勉思建樹母爲俗吏卒贈如其子官滋
舉順治十年甲午鄉試辛丑登進士康熙九年授江南績溪令
績故巖邑民健訟據險相爭或歷十數年不解滋以理諭一無

譁者剷除巨蠹莠民偪伏刁惡之風爲之革績多石田雨多則溪漲而潦雨少則溪落而涸爲之設法蓄洩旱潦有備捐金修學宮興學教士士習以正除民患興民利皆設誠而致行之饒寇之變全省震動調兵至滋措餉助剿寇得速平方最功旋丁艱歸服闋補蘇州府吳縣令吳丁漕繁重挪移侵蝕逋負纍纍前令因此掛冠去者相接滋督催有法丁銀十餘萬兩漕白二米八萬餘石皆寓撫字於催科民胥感悅樂輸虧空盡補漕政卷贖如山留心檢察凡五載積案一清邑多名宦巨族遇事令多瞻徇滋一裁以法干請盡絕小民稱其平又以餘力設養濟院以賑窮獨設養生院以活孤兒百姓愛戴織衣爲壽康熙二

十年湯文正公巡撫江甯州縣承風旨皆兢兢於治惟滋與吳江令郭琇廉能稱最以積欠未徵不得與行取二十五年湯公疏薦格於部議 特旨允行 賜陞見授刑部雲南司主事

勤慎供職清操益勵以大司寇陳公薦陞本部員外詣獄檢囚哀矜在抱每冬月煑粥製棉按名施給獄囚感泣咸曰劉老爺活我遷禮部主客司郎中旋奉 命提督山西學政按察司僉事先是令績溪時爲江甯同考官得知名士彭定求顧焯等六人繼任憲部庚午典試雲南得尹泰等數人亦績學士也滇省文風始爲之振 上以其精鑒衡故有是擢到任益勵夙心以拔眞才培士風自矢試卷皆自評閱校士三年苞苴不入門州

縣循例供給亦卻之平陽地震捐千金以賑丙子春染疾翌年

卒年六十五所著有四書辨疑行世

節彭定求劉公墓表兼探先正事略

王天縱字玉成貢生任常州別駕郡轄五邑最衝繁舟楫如織素多鹽徒出沒天縱職司鹺政殫心釐剔夙弊一清商民安之

舊志

王适字坤若祖父皆業儒蜚聲蠻序适以乙酉武舉累官至宣府都闈宣俗剛悍輕生适痛懲之三月而令行禁止又多奸人誘良家女爲妓若陳氏白氏樊氏皆誘入女閭者适廉得其實斷配良民置諸奸於法有袁黃冠姦其徒不從殺之反誣王姓者久爲疑獄适至立白之有紅石溝長數十里當事以形家言

欲塞之軍民將為變适力請罷之衆心遂安宣民至今誦之不

衰卒贈昭武將軍舊志

謝鑑字冰壺由貢監初授鞏昌別駕賑饑墾荒安民撫卒督開

茶馬市布德著威邊人悅服尋陞潞安司馬業經三薦以他事

註誤左遷山左藩司理問鑑才望夙著當事倚為長城後倦於

仕罷政歸興復乃祖蓮洲書院稱繼美焉舊志

葛清字慎先乾隆辛酉拔貢甲子舉人選天津府學訓導上官

奇其才委查滄州賑時稱嚴介薦授山西鄉甯縣知縣積案填

委立剖決曲直不惑邑多虎患俗以為神無敢議捕者為設法

除之患以息分校庚子鄉試得士稱獨多調署吉州知州政聲

卓著平陽守保薦卓異以老辭遂乞歸講學鄉里一時多所成

就

節菟公墓誌

孫玉鎔乾隆癸卯科舉人大挑一等以知縣用分發江蘇甄別二等降補上元縣縣丞奉委揚州府稅務署淮安府經歷修築河隄大憲念其勤勞委署泰安縣知縣凡兩月善政多端旋卒於上元任所

續志

王朝棟字擎雲乾隆戊申副榜就州貳分發陝西值嘉慶元年川楚教匪起事陝境議堵剿委襄辦軍務自軍興至平靖無役不與積十八年始補邠州州判時年六十二矣自痛致身軍事歷盡艱苦功績不獲上聞憤取所著躋躋錄焚之而卒

續志

徐連字子達中嘉慶戊午舉人已巳成進士授國子監學正旋改就知縣選授四川冕甯縣每歲春月米價昂貴窮民苦之連做常平之法開倉廉糶至秋糶穀實倉穀歲易無朽蠹糧價趨平民食亦濟調西昌縣西昌田水旱不均設法疏通俾無障塞旱田變爲水田者數百頃道光辛卯卒於任所

節李紹絳徐公墓表

劉承謙字益府邑北定人幼聰穎從學家塾共聽講說獨有領悟十九歲入邑庠嘉慶癸酉拔貢是年領鄉薦丁丑成進士點內閣中書性淡泊不樂仕進乃改教職居閒研究經史所造益深兩任教諭捐俸爲月課費先後丁內外艱歸服除遂不復出主講南宮縣東陽書院歷十數年南宮之學爲文者一經指授

皆有法度可觀門下士成進士者二中鄉科者十有三優副貢各二拔貢三其餘率明經食餼焉南宮縣科名入

國朝二百餘年以是時爲最盛則承謙主講之力也承謙雖不仕而能以師道自任樂得英才而教育之俾濟濟多士蔚爲國楨視職任一官其成就能如是之大且遠哉年六十七卒於東陽書院受業諸弟子共爲立碑表墓以誌教思長子元震能紹其家學道光丙午科舉人官蔚州學正

節夏應芳
劉公碑銘

徐龍雲字霖臣其父連以進士令於蜀龍雲生於任所丁艱歸年未壯也乃命其弟就學身親家政兄友弟恭家庭肅睦弱冠補弟子員中咸豐戊午舉人值山東教匪擾直省一歲犯任境

者數次邑令張公光藻知其才凡修城浚池籌餉練勇諸務悉以任之以禦賊功制軍劉公長佑特疏薦選湖北巴東縣知縣歷署黃安宣恩等縣所至著政績以事拂上憲意改教職歸授甯晉教諭捐俸倡修 文廟旋卒於官

馬琨號蔗圃弱冠食餼因屢躋鄉闈乃就教職所在士悅心服咸豐三年署涿州教諭協辦團練著有團防紀略籌畫周悉多

可見諸實行

冊探訪

馮國楨字殿撰邑辛留寨人由廩生捐分戶部郎中加捐知府簽掣湖北道光二十八年署德安府甫三月政教一新紳民製錦頌德調鄖陽府修書院課生童額外自備膏獎年餘文風大

振士子豎碑頌德歷任施南安陸等府其在安陸也值粵匪猖獗所在奸民嘯起國楨選練壯勇一千餘名親教隊伍督鍾祥縣李令楨拏獲巨匪郭大安馬騾子匪徒斂迹闔屬賴以稍安士民感戴爲立生祠以功授荊州知府以年老告病歸

劉永錫字延僖始祖朝宗自山西洪洞縣徙居任之環水村遂家焉世業儒數百年來列膠庠者不絕永錫幼聰敏嗜學年十七補弟子員十九舉道光乙未鄉科揭曉謁座師湯公毛公二公深器之稱其文有大家風屢躋會闈甲辰大挑二等咸豐七年選永清縣訓導教授常數十人視門生如子弟門生亦戴之如父兄知縣吳公履福與有年誼深相結事多諮決時遊匪擾

近畿永清城垣毀圯邀與籌備禦計突有潰勇千餘人至城下
鳴張甚人心危恐策無所出永錫以計諭遣之吳公服其略永
清人皆頌德焉丁內艱歸同治六年邑修 文廟錫總理其事
頗著勞績壽五十四卒長子書旂中光緒丁酉科舉人能世其
家

王瑾字懷甫邑城內人咸豐三年父沒未葬忽粵匪入境瑾抵
死守樞賊掠之去間道逃歸同治元年教匪起山東瑾投營請
效力隨統領王某駐防威縣賊約戰瑾奮勇請先統領帶隊隨
之行數里至沙坑賊自遠圍之官軍火器不能及時有護衛擡
銃四十桿瑾請帶其半巡防兩界見有賊酋持黃旗統數千騎

將至命衆兵擎銃待稍近銃齊發斃其酋餘賊驚退適余承恩
兵至遂乘勝抵下坡寺等村焚賊營衆欲分其功瑾不肯功遂
不錄忿而歸家居三載值叛匪張錫珠宋景詩先後擾畿南邑
城戒嚴聞賊自北來瑾步往探之至三里橋賊蜂擁至瑾仗劍
直前研樹攢簇枝持以爲盾蔽縣令張光藻在城上望見之出
隊迎大呼懷甫子龍膽也已隨他軍戰賊沙河縣之八里灘衣
裨皆糜碎他人驚失色瑾膽氣自若遂隨余承恩常開運諸將
逐賊於尖叉路於清水河轉鬪至隆平縣西界降賊三百餘名
同營多得保舉者瑾僅得兵備道王賞給六品功牌繼蒙按察
使李布政使唐予以把總歸標咨部曾文正公督直奏保以千

總拔補並加守備銜後歷署沙內廣鉅等汛光緒某年卒

刪易王公

家傳

論曰世有得軍功保舉其人未始從軍者即或從軍而推其保舉所由來亦不盡在効力前行也而鄉閭匹夫上無當之援旁無要人之託徒義勇激發欲拚一死以博微官計何拙也勞苦而無功固其所耳又何感焉

鄉耆

明

陳愿字從志為諸生事父母愛敬備至父獻先亡母霍氏守節二十餘年愿晨昏定省如一日及歿廬墓側朝夕號泣甘旨不

入口者三年喪畢始歸家齋前忽生一草色白味香狀如雲識者以爲靈芝嘉靖十五年知縣李仁上其事撫按及兩道共建

錫類坊旌之

舊志

霍玉父原先亡嫡母陳氏老而多疾玉廣求醫藥治之凡飲食必躬自執爨數年不懈既而母脫齒不能食求乳以奉之至玉領鄉薦母始沒惜未仕而卒

舊志

霍守忠爲人和易樂善父昇卒以禮殯葬事母備極甘旨母疾親嘗湯藥朝夕焚香祈以身代比卒哀毀幾絕廬於墓晝夜拜泣者三年正德十六年知縣張瓚具以聞旌其門曰孝行

舊志

陳易泰學博陳時雨子爲諸生性至孝養生送死曲盡情禮父

母歿皆茹素廬墓三年負土築墳悉躬親之朝夕薦享如事生

焉知縣徐璘聞於上臺旌之舊志

潘成家貧事母克盡子道遇宴會有新果時蔬如母未嘗弗食

也親有怒則和婉以解之釋而後止直指使者兩旌其孝行焉

舊志

檀光閔字開美髫年補弟子員十七中崇禎庚午舉人斂飭如

處子居喪一遵古禮尤究心性理及河洛之書戊寅 清兵克

城殉難卒舊志

國朝

孟若藺邑留壘村人父號存吾若藺其第三子也幼而穎異秀

出未弱冠應童子試輒冠軍謂科第可操券得竟數奇爲諸生
老性孝友少失恃事繼母以孝聞父病疽日夜侍藥餌衣不解
帶者四十餘日明崇禎戊寅兵變伯兄季弟俱遇害所遺藐諸
孤子立煢煢少弟年尙稚不能事家事若藺皆一身經紀之從
兄之子協子壻王允升俱少失怙恃資產無所託並代任家督
二子壯以原產還之無一隴一椽之損於舊處鄉曲遇事有是
非一斷於理不專作好好先生人以故始畏而終服戊寅之變
避難入郡城登陴助守獻備禦策郡守用之城賴以全衆大驚
歎不意墨翟在諸生中也家居蒔花竹藏古圖書器玩甚夥能
詩工書畫有手摹蘭亭及網川圖當其得意雖拱璧不啻也又

豪爽嘉客無少長皆樂從之遊行年六十餘無龍鍾態卒之日里人皆相與歆歔以為孟公沒吾里其無人矣其為人所推重如此

節邑人劉滋
孟公墓誌

論曰自世以科名重而一鄉之善士多不顯彼釋褐而出衣錦而歸挾厚貲以相誇耀其有益於宗族鄉黨視斯人何如也

謝豐年崇禎中貢生時鳴孫也幼聰穎為文多奇古出人意表為諸生時郡侯金之俊器重之授以手評墨律邑侯趙時晉延為子師潛心講課未嘗及私事與江南馬君常遇於京邸一見即定交戊寅歲君常南歸道出任邑時初經殘破見豐年廬舍

灰燼出俸十金爲贈豐年謝曰我知明公明公不知我矣堅卻

之九躡秋闈考授州司馬未仕而卒

舊志

左瓚字敬宸天性仁孝廉謹誨人不倦多成名者順治間貢生

非公事不入公門人咸重之

舊志

駱閑則字順之爲人慷慨尙風節學術純粹有聲庠序間以文行誨人以義方教子邑中名士多出其門下子在中其中皆相

繼成名

舊志

張文暉爲諸生素性耿介課子之外不問戶外事無片紙干瀆

公庭無一響致警鄉曲施地二十畝以建社學

舊志

樂養重天資樸厚素以孝稱其父一選嘗遇寇將殺之養重跪

請願以身代寇憐其孝而釋之將析產盡讓之伯仲一無所爭

舊志

駱在中字正平年四十補諸生為人清謹事親克孝自孩提以成人未嘗有疾言遽色於父母之前安貧而豐甘旨人皆以養

志稱之舊志

趙光正輕財尚義孝友性成幼年喪父即知愛慕每食必薦過墓必哭拜而後去事寡母高氏極其誠敬雖糲食必婉容以進敦友于之誼昆弟無間言舊志

馮文字雲錦邑辛留寨人高祖巡宰起家曾祖縣尉遭明季兵燹浸微父生字務農頗重儒文生九歲出就傅年十二應童試

邑侯張公有光大奇之置前茅因從學十四受知學使楊賓時
爲諸生旋食廩餼授先儒語錄三魚堂榕村講授諸書聞白敬
求王無忝皆理學宿儒往從遊年十五同懷弟讀書而方四來
從學者十餘人嚴講課究心四子書喜觀史爲凡例辨義理論
事變考制度爲文皆直達所見期有發明於聖賢之義而止搆
思過深心血損患目病遂棄舉子業持家嚴有法治生業不數
年累巨萬喪事遵家禮不作佛事僧道尼姑不入門著爲訓善
解事四方有就謀者必爲盡心時任方營田民苦之太守陳法
下車策諸生文舉營田利病對太守韙其議自上憲事得寢年
六旬家事以付子孫素善醫或就醫者不之拒餘非大事不以

聞王無忝年九十餘講陽明學時設具邀之商折朱陸異同有不合至聲色俱厲而交好亦無間一生拳拳斯道惜日病無甚著作也卒時年六十有四

節邑人葛清達生先生傳

劉誥性純厚樂施予尤篤於親族從兄典家貧爲購宅營室器用薪米悉以資之憫村人子弟多無力延師乃創立社學施田九十畝充常年經費值歲荒取先後負債者券悉焚之約四千緡其孫承謙成進士承謙子元震復中丙午舉人遂爲世家魏鍾秀字良材性方剛不濫與人交而樂施予親鄰中有喪葬婚嫁不能自給者推解無吝色議修文廟捐巨資爲邑人倡家塾延師有願就學者卽令肄業其間待之如子弟鄉里稱盛

德焉

張秋保素務農業性至孝能曲體親心嘉慶十九年春父母俱病欲食肉家貧不能得遂隱取鎌刀割左腿膾肉烹而進之次日痛不能起月餘始痊邑令趙克鎰賜額旌之曰苦身事親復其徭役

續志

徐廣聚駱莊村人家貧親老竭力以養嘗傭工於數里外所得柴米晝無暇夜乘間送之後乃傭工於本村以便奉養家有長兄並不推諉說者謂孝友兼盡云

續志

韓昇東欒村人家富好施予設義塾以教鄉鄰子弟鄉中有貧不能度歲者嘗計戶計口以錢米分給之婚喪之事量力周恤

邢臺大樹村有猾賊雜石毛者夜竊昇家被獲昇與酒食勸令

改行一方獲安探訪册

魏廷麟字瑞生廩貢生性至孝母年八十患腿疾乃製輦椅令人舁之游園內廷麟侍側共笑語母若忘疾之在身也母歿廬墓三年治家嚴而有法子女八歲以上不得同遊戲子弟無故不出家門手訂規條俾家人各書一通恪爲遵守廷麟父嘗捐巨資重修文廟廷麟復施義田一百五十畝擇邑有學行者經理歲入以爲常年修葺之費城南四里許阡陌不通官道農民苦之乃割地爲道以便田事亦可謂富而好行其德者矣

張好學幼失恃孝事繼母繼母生一子欲析居好學跪求之感

以至誠會繼母又卒父復娶好學孝不衰從父見其處人倫拂逆而始終孝順無違心愛之繼以爲嗣遂能大其家

探訪冊

趙士俊郡庠生設教鄉里講授有法終日儼然雖長日晝不親枕席自壯至老如一日與一兄一弟共資產每聚首一堂怡怡

如也前後邑尊皆推爲鄉望壽八十餘卒

探訪冊

郭德明性友愛有少弟繼母所生繼母有私積臨終囑以歸其弟繼母葬後同居者復數十年德明年七十餘始謂其弟曰母氏私積三十千吾爲汝息之已滿六百餘千矣恐他日諸子弟有異言及我在也全以歸汝餘產析之爲各度日之資悔少失學子弟無敏鈍皆令讀書遇貧乏嘗量力周濟之年八十餘卒

王春泰字開三任之東望馬台人幼沈潛稍長嗜學五經皆能背誦弱冠補弟子員歲科試輒魁其曹而鄉闈屢躋意泊如也益孜孜實學以爲輿地之學圖爲最要而苦無精本因倣晉裴氏繪圖之法上揆天度下準地望統廿二行省分圖以致其詳總圖以觀其合凡高山大川之所盤鬱而輸寫斥埃之所星羅而碁布此界彼域之侏邪而離絕以及原隰之弧直水陸之紆捷關隘之險易郡縣之參錯莫不依方定位枚數瞭如圖後各繫以註某山之脈某水之源某地之名稱沿革及形勢扼塞物產風俗胥參稽今昔而揭其歸使覽之者皆如親履其地精天文占候咸豐戊午慧星出謂當主科場厄運同治八年有星孛

昂胃間歎曰此方其有兵禍乎已而皆然雖地球旋轉無晷刻停當以天之何度準地之何方然精其術者往往奇驗或亦不盡誣也居恆讀書有定程晝無暇則夜以補之藏書素富皆丹黃而甲乙之手自錄者復若干卷嗚呼可謂勤矣後因不戒於火藏籍燬焉所自著亦多燬故皆未梓行年六十餘卒於家

吳奉琳邑庠生世居環水村祖世榮父慶祥由農商起家至奉琳而家益大兄弟九人敦尙友愛每歲除夕焚香告天誓不分異家人感其化亦皆心其心子姪十五人孫四十一人曾孫二十四人元孫五人壯執業幼課讀咸若於長者之訓家門百四十餘口無間言知縣謝公嘉其行據情上詳以旌異之非僅以

爲吳氏之榮也蓋見夫民俗之偷薄極於里黨其原實起於家庭德色見於耨鋤諍詬生於箕帚兄弟有相瘞無相好婦姑不相悅則相稽乾餼之愆豆觴之釁幾於十室而九故齊家之事賢者猶難之而吳氏獨能同財共業舉百數十口不齊之人而使之齊藉非恩義篤而藹然有親分數明而秩然有序曷克臻此哉昔壽張張公藝江州陳兢皆以數世同居見美前史如吳氏者比之古人雖尙未逮而在一郡一邑中要亦難得而可貴者也彼以父子兄弟之親析產異居聞吳氏之風其可以少愧矣

魏恩榮貢生居家孝友祀先遵古禮每祀之前三日必讀家譜

一周以爲致思之地祀品必親爲之祀時必公服祀畢餽餘必均或他適出入必祭告於主前他人雖迂之弗顧也飭身接物主於信而以謙行之仁厚樂施予講陰騭嘗遵袁了凡功過格誓行三千善讀書有程日有記積數十年無一日間晚乃撮先正格言及己所躬行心得者輯爲書以教後嗣焉

董修德邑之東盟台人性樸厚事親以孝稱親沒兄弟析居家儲二百金盡讓以予其兄置祀田爲宗祀費有餘卽以贍族之貧者豆村孫某以地契質百金後貧不能償出地契還之光緒四年歲大饑修德有儲粟四十石盡出以賑鄉里鄉人至今思其德

韓麟書邑之驛頭村人精醫術自設藥肆有求醫者無弗應其無力購藥者貫與之不責其償沒後鄉人爲立石頌德

孟春和增生諳岐黃術諸醫書多所究覽而尤服膺於張仲景恐其稍猛也則以朱丹溪調劑之治時疫多立效而於兒科痘疹白噪二症尤精有謁請無弗應醫治皆爲之盡由是一方無天 沒後數年鄉里思之不衰遇危疾他醫不能治者則相與惻然曰使孟先生在者斯人或不死也其爲人所信恃如此

宋萬春邑齊村人有從堂祖母達氏子死媳嫁遺孫僅六歲家貧如洗達病篤囑萬春曰我死汝葬我此子可令繼養於人無多累汝既死萬春殮以衣衾棺而葬之養其遺孫於家既長爲

授室予以田宅令自爲門戶焉

俠義

明

胡世榮業農勤儉明天順八年歲饑榮輸粟二百石備賑郡守

楊浩嘉其爲立石

舊志

翟東周字文獻事父母以孝聞居鄉多厚德正德年間流賊攻

掠邑城東周率衆刼營獲賊首賊遂大潰城賴以全

節劉鼎翟公墓志

李棟有祖地十二頃與弟梁均分之後梁盡售其地棟又以已

地益之知縣陳璣知其事舉爲飲賓一日遊郡庠聞號舍有書

生苦學往謁出白金以贈生後聯捷詣謝卽都憲朱裳也

舊志

張仕科樂善好施貧不能葬者皆給以棺共施棺一千七百餘具崇禎間舉為飲賓輿論咸以為無愧焉舊志

楊蕢年二十有二而鰥遺一子母諭之再娶蕢曰娶而不良則仰事俯畜皆無所恃卒不娶撫其弟芳芬蕙蘭皆為之畢姻有康泰者嘗遺金蕢拾得之揭於通衢泰認曰吾金也遂還之又李生枝者負貸穀被訟將就縊蕢救之代償其值其尚義樂施大率類此舊志

牛文科素有膽略明崇禎十三年知縣盧時升舉為練總禦賊有功直指使者題授本府守備十五年重兵壓境力戰而死舊志

姜占鼇撫標材官隨總戎盧象昇剿山西流寇盧為賊所迫墜

馬鼈掖之上馬盧得脫鼈爲賊所害

姜鈞鼈有文武材崇禎十五年土寇蜂起委授千總統兵剿之三戰三捷獲賊甚衆尋拔弟子員首選子雲鳳爲諸生

舊志

國朝

吳盡忠原任山海關都司素以肝膽著閭里間順治初年土寇猖獗盡忠竭力守城乘夜擊賊敗之城賴以安順治六年有響賊百餘騎劫掠至臺南盡忠率衆追至邢家灣單騎突入賊圍馬蹶爲賊所執欲降之忠唾罵不屈而死

舊志

杜起字拔字任之程爾棊人明崇祀鄉賢宗壽之猶子王府典寶培裔也好讀書佃儻有大志嘗以邑爲大陸故地衆流所匯

多水患故於河道源流民生利病尤致意焉所居村南二里許有程寨河日久填淤不能通流康熙季年鄉人議疏之呈於分府格不行乃親歷河之上下及其他九河八水並詳察其源委又自穆家口崔家樓馬家店王甫隄直指北泊相度形勢瞭然如指諸掌謂鄉人曰同一疏也與其疏程河使水歸於南泊孰若疏古滄使南泊之水由北泊而歸海與其呈分府孰若上叩帝闈耶遂變產爲資具呈赴京師控於怡賢親王王轉奏而勘水之詔下通志所云雍正四年怡賢親王奉命查勘卽謂此耳時隆平縣以地處鄰封恐水患之波及也會同闔邑紳民阻撓之起以一人折之於王前曰諸公不效神禹之行而效白圭之

治耶王大喜之曰是也水由古溢歸北泊獨不能由北泊達海乎議遂定旋即委員督工

朝廷發帑以萬計旬月之間上自穆家口下至張家口四十里中淤塞盡開兼以挑河之土夾築長隄水行地中由北泊而達天津不特大陸變爲樂土即程河亦不爲害矣自是連歲大熟地成膏壤濱泊之民至今利賴無窮咸曰杜公之力也壽八十

餘乾隆十三年卒

節倪蘭生拔
字先生傳

趙巖性慷慨急人之難如恐弗及有范姓者欠銀百五十兩償以田因其人尙有母在也無田則母子俱餒遂以田還之焚其券巖子登瀛善承志以孝稱有張姓虧官項銀三百五十兩擊

獄其家哀懇求助遂如數代償之脫其囚鄉人咸感其義

謝交泰同治五年正月捻匪驟至泰逃難至辛店橋見賊挾一婦於馬上乃鄉人某之妻也直前奪之與賊格婦得逃賊衆至泰被刺死

論曰往讀史記游俠傳以爲朱家郭解之徒不過匹夫之勇耳何史公津津樂之如是乃今而知民羣之所以聚民氣之所以振皆任俠者爲之也戰國之時國俠之風盛矣至秦漢而少替然鄉里之俠猶不絕於人間此後乃無聞焉豈天之降材今果異於古所云哉蓋秦漢之世摧抑任俠者在朝權不在清議身雖捍夫文網名自重於當時故義勇少年猶喜

爲之自後儒談性理道中庸尙平易惡激烈其視激昂奮發
赴人急難一往不顧者皆以爲侵犯名義與豪暴之徒同類
而共譏之彼任俠者利旣弗顧名復難期孰復肯舍己爲人
徒致身名俱裂乎言念及此熱心爲之灰冷壯氣爲之消沮
顧視斯人誰非秦越民羣之渙民氣之靡舉由此也或謂仁
義之名豈不尊於任俠何必惟任俠之求不知仁義皆待任
俠而行者也今試有人焉被髮纓冠往救鄉鄰之鬪焦頭爛
額力拯比戶之災又試有人焉聞叫囂之聲而閉戶觀燄焚
之狀而安居此兩人者果孰是有仁之心義之實者也人以
有用於人爲貴故吾爲表章一二任俠之士或散財以濟貧

困或冒死以拯艱危雖較之古人尙多不逮而取其一節之近似風示羣倫或不無立懦廉頑之效焉彼守財之虜雌伏之夫庶有生其慷慨動其義憤者乎

隱逸

魏三國

張璠字子明少游太學學兼內外始居鉅鹿袁紹辟命不應移居上黨并州牧高幹除樂安令不就徙遁常山門徒且數百人遷居任縣太祖爲丞相辟不詣太和中詔求隱學之士能消災復異者郡累上璠發遣老病不行廣平太守盧毓到官三日紀綱白承前致版謁璠毓教曰張先生所謂上不事天子下不友

諸侯者也豈此版謁所可光飾哉但遣主簿奉書致羊酒之禮
青龍四年辛亥詔書張掖郡玄川溢涌激波奮蕩寶石負圖狀
像靈龜宅於川西凝然磐峙倉質素章麟鳳龍馬炳煥成形文
字告命粲然明著太史令高堂隆上言皇古上帝所未嘗蒙實
有魏之禎命東序之世寶事班天下任令于綽連齋以問璠密
謂綽曰夫神以知來不追既往禎祥先見而後興廢從之漢已
久亡魏已久得何所追興禎祥乎此石當今之變異而將來之
禎瑞也正始元年戴鴛之鳥巢璠門陰璠告人曰夫戴鴛陽鳥
而巢門陰此凶祥也乃援琴歌詠作詩二篇旬日而卒時年一
百五歲是歲廣平太守王肅至官下縣曰前在京師聞張子明

及至問之會其已亡致痛惜之此君篤學隱居不與時競以道
樂身昔絳縣老人屈在泥塗趙孟升之諸侯用陸愍其耄勤好
道而不蒙榮寵書到遣吏勞問其家顯題門戶務加殊異以慰
既往以勸將來

三國志

明

苗而成字鳳亭任人也生而岐嶷嶄然異羣童既就塾卓犖不
凡讀書目數行下里中父老皆歎以爲班孟堅陸雲公之流自
大父以來世擅儒雅秉潛德而成益恢大之窮搜經史掇厥精
華墳典邱索既羅既弋旁訖二氏罔不汰其濁而釀其清性慷
慨磊落見明季海內雲擾遂有振衣千仞濯足萬里之思乃投

迹邱壑高尙其志且耕且讀親朋或勸之應舉謝曰在易之否
天地閉賢人隱優游嘉遯雖困而亨違時躁進厥咎履虎尾子
不見瑣瑣撫仕者乎小者微纏大者刀鋸啜其泣矣何嗟及矣
鄭子眞嚴君平吾之畏友也子無申申矣居恆徜徉潭澧蓬鵲
間憑弔山川慨然起舞望者疑爲異人而成雖隱於田間乎然
樂善好施克宏乃德親戚里門中善未嘗不揚惡未嘗不規困
未嘗不振災未嘗不救也人是以服其正而樂其仁燕趙之郊
無不知有苗先生者 皇清鼎建里人歌思舊德祠以奉之蓋
鄉先生沒而可祭於社者也以子澄貴贈光祿大夫兵部尙書
兼都察院右都御史迹其超然物外齊窮通一得失脫屣生前

之業豈慕身後之榮而天顧穀其後人使得從流離顛沛中蔚
起為興朝佐命著勳中外聲施爛焉論者咸歎其身雖隱而
道則行也要其初心固不在是嗚呼此可謂皎然不欺其志有

獨行君子者矣

節桐城姚文
然苗八墓表